



SIUMUT INATSISARTUNI ILAASORTAATITAT

16. august 2012

UKA 2012/162

Inatsisartut sulieriaasianni § 36 innersuussutigalugu apeqquteqaat aallavigalugu Inatsisartuni oqallinnissamik siunnersuut una saqqummiupparput:

Ingerlatseqatigiiffinni suliffeqarfinnilu Namminersorlutik Oqartussanit pigineqartuni siunissami qanittumi pinngortitaq mianeralugu qanoq iliuseqarsimanermik ukiumoortumik "naatsorsuusiortarlernissap" angunissaa pillugu apeqquteqaat aallaavigalugu Inatsisartuni oqallinnissamik siunnersuut.

(Inatsisartunut ilaasortat Kim Kielsen aamma Malik Berthelsen, Siumut)

Tunggavilersuut:

2006-imi Inatsisartut upernaakkut ataatsimiinnerminni siunnersuutit UPA 2006/42 aammalu UPA 2006/58 akuersissutigimmasigit nuannaartoqarluni, qiimmattoqarlunilu avatangiisinut nukissanullu eqqummaarittoqaqaaq, tamatumalu kingorna naatsorsuutit piujuartitsinissamut attuumassutillit Namminersornerullutik Oqartussat suliffeqarfiini aammalu suliffeqarfissuini atornerqarlarsussaallutik. Pisortat nukissiamik pingaarnermik innaallagissamik, imermik kiassarnermillu atuinerat saqquminerulersinniarnearpoq, taamaalilluni kingorna anguniagaqartumik siunertaqartumillu nukissamik atuinerput annikillisinneqarsinnaaleqqulugu.

Nunarsuarmioqatigiit nunatsinnik pisuussutaanillu soqutiginninnerisa annertusinerat aamma pissutigalugu qulliunerusut avatangiisinut mianerinninnerusumik politikkeqalernissaat – tassunga ilanngullugit ukiumoortumik pinngortitaq mianeralugu qanoq iliuseqarsimanermik "naatsorsuusiortarlernissap" taakkuninngalu iluaqutaasumik atuisarnissaq – pillugit nunarsuarmioqatitsinnut oqariartuuteqartariaqaratta.

Siunnersuutit aapaassaaneerneqarnerannut atatillugu taamanikkut Peqqissutsimut avatangiisinullu Naalakkersuisuusoq A sii Chemnitz Narup maj 2006-imi akissuteqaammuni ima allappoq: *"Siullermeerilluni oqaluuserinninnermi taaneqartutut Naalakkersuisut inassutigaat siunnersuutigineqartut akuersissutigineqassasut manna tungavigalugu pinngortitaq mianeralugu iliutsinik "naatsorsuusiortalernissamik" suliap ingerlarnga Nukissiutit pillugit politikikkut siunissamut nassuiaat tungavigalugu periaasissatut iliussissatullu Naalakkersuisut suliaata tamarmiusup ilaatut ilanngutitineqassasoq. Taamaattumik siunersuutaasut akuersissutigineqarsinnaannik Inatsisartut Eqqissisimatitsinermut Avatangiisinullu Ataatsimiititaliaata inassuteqaataa Naalakkersuisut isumaqataaffigaat."*

Siunnersuutit taakku Inatsisartunit isumaqatigiittunit akuersissutigineqarnerannit maanna ukiut arfinillit qaangiussimalerput. Ukiuni arfinilinni kingullerni qanoq pisoqarsimanersoq, siunissamilu qanoq pisoqassanersoq ilaatigut oqallisigerusupparput, tamatumani aamma ulloq 1. januar 2011-p kingorna nittartakkatigut quppernerit aqutugalugit ukiumoortumik "naatsorsuusiortarneq" – "naatsorsuutit qorsuit"-nik taaneqartunik - aaqqissuussamik atuilernerup kingorna misilittakkat sukumiisut suli saqqummiunneqannginnerat pissutigalugu . "Naatsorsuutit qorsuit" qanoq

annertutigisumik pisortatut oqartussaasunit, suliffeqarfinnullu atortinneqalernissaat ilanngullugu oqallisigerusupparput.

Suliffeqarfiit namminersortut, soorlu "Hotel Arctic" ukiuni kingullerni nammineerlutik "naatsorsuutitik qorsunnik" suliaqartarput, taakkulu peqatigisiaanik suliffeqarfik ukiumut avatangiisinut pitsannorsaataasunik suliffeqarfik sunik aallartitsilersarnersoq pillugu anguniakkanik saqqummiussisarpoq.

2009-mi Kommuninik kattussuussineq sioqqullugu Qaqortup Kommunua "naatsorsuutitik qorsunnik" suliaqartarpoq.

Taamattaq suliffeqarfissuit pisortanit pigineqartut arlallit sila avatangiisillu pillugit politikkeqartut ilisimavarput.

Namminersorlutik Oqartussat pinngortitamut ataqqinninnermik takutitsinissaa Siumup pingaartippaa, tassani aamma "naatsorsuutit qorsuit" pillugit ineriartortitsinerit aallartinneqareersut pillugit angusatut saqqummiunneqartunut tunngatillugu. Qanoq ililluta pitsaanerpaamik "naatsorsuutit qorsuit" siunissami qaninnermi pisortatut oqartussaasuni suliffeqarfinnilu atuutilersinneqarnissaat pillugu Siumut oqallinnermut peqataanissamik kaammattuijumavoq, taamaalilluta siunissami anguniagaqartumik siunertalimmillu pisortat nukissiamik atuinerisa annikillisinnissaat sulissutigisinnaassagatsigu.